

Fastizs da dinosaurs en la Val d'Alvra

Ils fastizs èn 200 enfin 210 milliuns onns vegls

■ **(anr/grc) Sin il Corn da Tinizong e sin il Piz Mitgel en il Parc Ela en Val d'Alvra èn vegnids chattads fastizs fossils da dinosaurs. I sa tracta d'ina spezia da saurs mundialmain da las pli veglias. Ils fastizs vegnan datads d'ina vegliadetgna da 200 enfin 210 milliuns onns.** Ils fastizs da dinosaurs chattads il pli savens en Svizra fin ussa sa chattan en il Giura. Mo quests èn cleramain pli 'giuven's che quests dal Corn da Tinizong, sco che il directur dal Museum da la natira chantunal *Jürg Paul Müller* ha fatg a savair ier a Cuir a chaschun d'ina conferenza da pressa.

Ils fastizs dal temp dal trias en furma d'in rudè senza unglas pe vesiblas mesiran al diameter radund 60 centimeters. Quests saurs da terra cun ils culiez lungs e cun medemamain lungas cuas sajan stads circa sis meters lungs e dus meters auts, èsi vegni communitgà.

En ina paraid-crap quasi verticala ha il paleontolog per hobi *Rico Stecher* scuvert quests fastizs fossils. I sa tracta da la segunda scuvertga sensaziunala da

quest scolast secundar da professiun. Damanaivel ha el l'emprim già chattà il skelet d'in saur sgulant bain mantegnì, d'ina spezia pli baud na betg anc enconuschenta e quella che el numna «*Raeticodactylos filisurenensis*».

Pliras spezias

Suenter il chat dals fastizs ha *Rico Stecher* infurmà *Christian Meyer*, paleontolog e directur dal Museum natiral da Basilea sco er expert davart dals fastizs fossils da saurs. Mademamain è era in auter arrivà sin fastizs da saurs, numnadamain il guid da viandar *Andreas Niedermann* che es stà sin viadi cun giasts sin ina tura da raiver sin il Piz Mitgel. Là ha el chattà ina platta da grip cun fitg blers fastizs da saurs. Intgins da quests darivan er da schinumnads 'sauropods' auters da spezias da saurs na betg anc enconuschentas. Quests fastizs fossils èn pli pitschens e mussan vesiblamain quatter unglas. Malgrà che *Andreas Niedermann* nun è scolà geologicamain ha el ditg: «Cur che jau hai vesì quests fastizs èsi

stà cler per mai ch'ì sa tracta da fastizs da saurs», ha *Andreas Niedermann* fatg a savair.

Perscrutaziun dura anc onns

Las perscrutaziuns scientificas davart da quests fastizs hajan pir cumenzà, ha il directur dal Museum da la natira *Jürg Paul Müller* infurmà. Mo na infurmar il public na saja er betg en urden ha el manegià, dentant che las perscrutaziuns en collavuraziun cun il Museum natiral da Basilea durian anc in pèr onns.

Trais chaussas sajan dentant oz gia cleras ha *Jürg Paul Müller* manegià: «Ils fastizs da dinosaurs scuvertgs en la Val d'Alvra valan oz sco emprims en talas furmaziuns geologicas sin auttezzas da radund 3000 meters sur mar. Ultra da quai demus-san quests chats che las regiuns avant la faudaziun da las Alps che era cuverta da la mar eran per part da temp en temp sitgas. Ed a la finala èsi segir che ils fastizs dals «sauropods' valan mundialmain sco talas perditgas las pli veglias», ha il directur dal museum natiral *Jürg Paul Müller* declerà.



Andreas Niedermann ha chattà fastizs d'ina spezia da saurs na betg anc enconuschenta sin ina paraid-crap dal Piz Mitgel.